

王維

竹居玃廬

全唐文
卷三百二十四之三百二十七

五
年

竹居牧齋

全唐文
卷之四百四十四

欽定全唐文卷三百二十四目錄

王維一

白鸚鵡賦

代陳司徒謝敕賜麟德殿宴百僚詩序表


賀古樂器表

賀元元皇帝見真容表

賀神兵助取石堡城表

門下起赦書表

謝除太子中允表



謝集賢學士表

謝御書集賢院額表

爲薛使君謝婺州刺史表

爲崔常侍謝賜物表

爲畫人謝賜表

爲曹將軍謝寫真表

爲幹和尚進註仁王經表

爲舜閣黎謝御題大通大照和尚塔額表

爲僧等請上佛殿梁表

責躬薦弟表

請施莊爲寺表

奉敕詳帝皇龜鏡圖狀

帝皇龜鏡圖兩卷
令簡擇訖進狀

請回前任司職田粟施貧人粥狀

謝弟縉新授左散騎常侍狀

備象器飾外立增飾常科

飾面首珍寶輝由采兼資入

奉殊有帝是誠餘圖

分國朝典則
帝皇則典則
帝皇則典則

符象儀式書

文雅典章

欽定全唐文卷三百二十四

王維

維字摩詰太原祁人徙河東開元九年進士歷右拾遺三
遷吏部郎中天寶末爲給事中祿山陷兩都爲賊所得僞
病瘖拘於普救寺迫以僞署賊平陷賊官三等定罪維以
所爲凝碧池詩聞於上肅宗嘉之會弟縉請削已官以贖
兄罪乃責授太子中允乾元元年轉尚書右丞二年卒

白鸚鵡賦

以容日上海孤
飛色媚爲韻

若夫名依西域族本南海同朱喙之清音變綠衣於素彩

惟茲鳥之可貴諒其美之斯在夫其入翫於人見珍奇質
狎蘭房之伎女去桂林之雲日易喬枝以羅袖代危巢以
瓊室慕侶方遠依人永畢託言語而雖通顧形影而非匹
經過珠網出入金鋪單鳴無應隻影長孤偶白鷗於池側
對皓鶴於庭隅愁混色而難辨願知名而自呼明心有識
懷恩無極芳樹絕想雕梁撫翼時銜花而不言每投人以
方息慧性孤稟雅容非飾含火德之明輝被金方之正色
至如海燕呈瑞有玉筐之可依山雞學舞向寶鏡而知歸
皆羽毛之偉麗奉日月之光輝豈憐茲鳥地遠形微色凌

紈質彩奪繪衣深籠久閉喬木長違儻見借於羽翼與遷

鶯而共飛

謹按本限八韻賦止
五韻郝名遠作亦同

代陳司徒謝敕賜麟德殿宴百僚詩序表

臣某言支使某官奏事迴伏奉某月日手詔賜臣以皇太子所寫聖製麟德殿宴百僚詩序日月揚光風雲動色捧受之次震駭失常臣某中謝臣伏以經天緯地者聖人之文多才多藝者元良之美逖聽前修旋觀往冊考論盛德罕見全能故漢后詠歌有乖雅頌之旨周儲聰哲不聞翰墨之妙伏惟陛下道洽帝堯文超繫表體陰陽之變化與

雲漢而昭回皇太子德邁生知學資聖訓掩鍾張之筆札
並虬鸞以飛動臣特承湛恩荷此殊錫集榮光於外府啟
重寶於私庭班氏賜書既甚懸隔馬卿視草曾未比擬又
臣所獻奉和詩事等賡歌情同率舞濫吹之音謬塵於天
聽踰涯之賞忽降於絲言豈臣微力所宜負戴非臣捐軀
所能效益無任榮荷感惕之至

賀古樂器表

臣維言伏見今月七日中書門下敕牒道士申太芝奏稱
伏奉恩旨令臣往名山修功德去載六月二十日於南海

葛洪居處至誠祈請中夜恍惚見一老人云是茅山羅浮
神人常於七曜洞來往昔曾於九疑山桂陽石室中藏天
樂一部歲月久遠變爲五野豬彼郡百姓捉獲汝可往取
獻皇帝每祈祭但依方安置奏之卽五音自和天仙百神
應聲降福所求必遂壽命延長臣奉神言卽往桂陽尋問
百姓云天寶二載村人常見有五野豬逐之便走入石室
就裏尋覓化爲石物五枚眾共驚異臣取以扣之音律相
和與神人言不異今將奉進者臣聞陰陽不測之謂神變
化無方之謂聖唯神與聖感而遂通伏惟開元天寶聖文

神武應道皇帝陛下居皇建之極中得混成之大道奉先
天之聖祖元化協於無爲育率土之羣生至仁侔於陰隲
然猶精意不倦聖祀逾崇遍禮羣仙思祐九服故得庀眷
皓髮遙同入昴之人真訣元言來告馭風之客棲身七曜
以俟唐堯藏樂九疑不傳虞舜留茲石室思獻玉墀憑野
豕以呈形表洞仙之屬意且神物思變古亦有之龍躍平
津實爲寶劒鳧飛葉縣空餘素履器非上品人纔下仙猶
能精誠聿修神變浚若況殊庭致貺天老效祥願授至尊
以享上帝亦旣考擊動諧律呂韶濩慙其九奏雲咸失其

八音翠鳳入於洞簫殊非雅韻朱鷺傳於鼗鼓敢比仙聲
天地同和神祇降福無窮之壽永撫寶圖無疆之休以康
庶績實由至德斯感大道元通神人親告於休徵靈仙不
祕其空樂稽之古昔實未見聞臣等限以留司不獲隨例
抃舞不任踴躍喜慶之至

賀元元皇帝見眞容表

臣維言伏見中書門下奏上黨郡奏啟聖祖大道元元皇
帝玉石眞容主上聖容今月十五日三元齊開光明其日
戊後道士陳希玉等十三人同朝禮見內殿有光非常照

耀及開殿門其光彌盛滿堂如晝久之方散其時檢校官
及押官等皆共瞻覩者臣聞仙祖行化真氣臨關聖人降
生祥光滿室固知仙聖必有景光伏惟開元天地大寶聖
文神武應道皇帝陛下大道爲心上元同體挾風雲之質
敬想猶龍寫日月之儀欽承大象仍迴舊邸以奉清都真
容聖容旣明四日照殿照室忽類三光禁宮自明初謂上
天無夜桂殿如晝還疑就日而朝琪樹韜華瑤池奪映實
由陛下宏敷本際大啟元宗明君潤色於真源聖祖和光
於帝載表文明之在御六合以清知臨照之無疆億載多

慶臣等限以留司不獲隨例拊舞無任踴躍喜慶之至

賀神兵助取石堡城表

臣維等言伏奉中書門下牒伏見絳郡太平縣百姓王英
杞狀稱去載七月於萬春鄉界頻見聖祖空中有言曰我
以神兵助取石堡城當時具經郡縣陳說並有文狀申奏
訖今載正月又於舊處再見云我昔於梓州威洞造一龕
尊像在獨坐山東北公成山左側年代已遠其處傾陷像
在土中可報吾孫令人往取斯乃蒼生之福國祚無疆者
近奉進止差直省往彼求覓昨見梓潼郡奏稱去載某月

二十六日郡縣官吏並道士父老百姓等一千餘人與直省李萬德依此尋求其日諸山盡皆晴朗惟公成山上雲霧暗合遍尋不知所在遂結壇齋戒祈請經宿至二十七日辰時有五色雲見於霧合之處遂卽分人子細尋覓乃見山半腹有少土傾處其上竹樹非常蒙密並見一石角出土一寸便穿掘深三尺已來乃是一石龕龕中有尊像一左右真人六並師子崑崙各二遂以水洗沃儀相儼然事實吐符並如真誥其石龕重大非人力所能運轉今於龕上造屋宇便差精誠道士三人專修香火供養謹畫圖

奉進者臣聞元德升聞與至降監必錫靈貺彰厥有成不
祕祥符昭其克享伏惟開元天地大寶聖文神武應道皇
帝陛下以道理國以奇用兵先天而法自然終日不離輜
重故得仙君居九霄之上屢降中州聖祖在千古之前還
臨後葉視之不見者今見聽之不聞者今聞仍敕神兵以
助王旅天丁力士潛結鸛鵝星劒雲旗暗充貔虎遂殲逆
命之虜果屠難拔之城加以言必有徵德無不報指尊像
之所在爲寶祚之休徵周流六虛言於晉而驗於蜀混成
一氣出於有而入於無未達齋心初迷三里之霧旣符真